

Kelonggaran pergerakan lonjak jangkitan

Putrajaya: Kelonggaran diberikan biarpun negeri di Lembah Klang seperti Selangor masih dalam perintah Kawalan Pergerakan Bersyarat (PKPB) menjadikan segelintir masyarakat mengambil mudah prosedur operasi standard (SOP) untuk menghalang jangkitan COVID-19.

Pakar Kesihatan Komuniti di Fakulti Perubatan Universiti Kebangsaan Malaysia (UKM), Prof Dr Sharifa Ezat Wan Puteh, berkata akibat kelonggaran itu juga pergerakan masyarakat sangat tinggi, walaupun ia diberi untuk keperluan penjana ekonomi negara, bukannya disebabkan wabak mudah dikawal.

“Pergerakan tinggi menyebabkan kemungkinan jangkitan berleluasa dan banyak kes dijangkiti tanpa simptom, menyebabkan penularan lebih mudah berlaku.

“Isunya apabila jangkitan berleluasa dan kemungkinan menjangkiti komuniti berisiko tinggi seperti warga emas, mereka yang tinggi komorbiditi seperti darah tinggi, kencing manis dan sakit jantung serta kanak-kanak.

“Jadi dalam segenap hal, SOP perlu dipatuhi dan elak bersikap alpa dengan jangkitan,” katanya

kepada *BH*.

Beliau menegaskan, sepatutnya konsep kerja dalam talian dan dari rumah perlu diperluas dan diguna pakai sekerap mungkin, bagi mengelak ramai tenaga kerja terpaksa berada di luar.

Ditanya mengenai perumahan pekerja, termasuk warga asing yang menyumbang penularan wabak COVID-19 atau sebarang penyakit berjangkit, katanya, sepatutnya majikan, Kementerian Perumahan dan Kerajaan Tempatan (KPKT) serta Kementerian Sumber Manusia dan Jabatan Keselamatan dan Kesihatan Pekerjaan (JKKP) melihat perkara itu dan memastikan keperluan pekerja ditepati.

“Ia membabitkan ruang kerja selamat, tempat tinggal, jumlah gaji dan keselamatan pekerja, berikutan memang diketahui keadaan asrama dan perumahan pekerja asing terbiar, sesak dan kotor serta menjijikkan.

“Masalah ini sudah lama dan apabila mereka masuk ke Malaysia, ada yang membawa penyakit berjangkit seperti tibi, kusta, hepatitis dan HIV,” katanya.

Beliau turut mempersoalkan

bagaimana pekerja asing masih boleh masuk tanpa dikesan dengan teliti serta dipastikan bebas daripada penyakit berkenaan

“Jika asalnya mereka sihat di sini, dari mana pula mereka terjangkit COVID-19? Adakah daripada komuniti dalam Malaysia atau ada yang membawanya dari luar negara?

“Jika punca jangkitan COVID-19 dari luar negara, bagaima-



Sepatutnya konsep kerja dalam talian dan dari rumah perlu diperluaskan dan diguna pakai sekerap mungkin, bagi mengelak ramai tenaga kerja terpaksa berada di luar.

Dr Sharifa Ezat Wan Puteh,
Pakar Kesihatan Komuniti
di Fakulti Perubatan UKM

mana mereka boleh keluar atau masuk ke negara ini melainkan melalui jalan tikus,” katanya.

Pakar epidemiologi Universiti Putra Malaysia (UPM), Prof Madya Dr Malina Osman, pula berkata individu yang tinggal di kawasan berdekatan kluster COVID-19 wajar mengurangkan aktiviti luar, dalam komuniti selain sentiasa mematuhi amalan pencegahan disyorkan.

Mengulas peningkatan jangkitan COVID-19 di Selangor, terutama apabila sekolah akan dibuka tidak lama lagi, katanya, ada kemungkinan kes positif juga berlaku dalam kalangan kanak-kanak dan lebih malang jika kebanyakan mereka tidak bergejala.

Beliau menjangkakan kes jangkitan akan meningkat dalam tempoh satu atau dua minggu akan datang, berdasarkan pola pergerakan ketika ini serta kadar pematuhan SOP yang tidak begitu menggalakkan.

“Secara ideal, PKPD sepatutnya dilaksanakan, namun realitinya ada kekangan sumber dan logistik untuk melaksanakannya, justeru perlu ada pendekatan lain lebih praktikal,” katanya.